

SPDP Yakin PM Akan Beri Posisi Kepada Anggota Parlimennya
Bernama
9 Jun, 2013

PAKAN (Sarawak), 9 Jun (Bernama) -- Parti Demokratik Progresif Sarawak (SPDP) berharap Perdana Menteri Datuk Seri Najib Tun Razak akan memberi ruang dan posisi kepada pemimpinnya di peringkat pusat.

Presidennya, Tan Sri William Mawan Ikom berkata SPDP memberi sepenuh kepercayaan mengenai perkara itu kepada Najib yang juga Pengerusi Barisan Nasional (BN).

"Walaupun SPDP kini belum lagi ada perwakilan dalam Kabinet persekutuan, kami yakin Yang Amat Berhormat (perdana menteri) akan memberi ruang dan posisi tertentu dalam kerajaan pusat kepada beberapa anggota parlimen daripada SPDP," katanya hari ini.

Mawan, yang juga Menteri Pembangunan Sosial Sarawak, berkata demikian pada sambutan perayaan Gawai Dayak di Rumah Panjang George, Nanga Nangsang di sini yang turut dihadiri Najib dan isterinya Datin Seri Rosmah Mansor.

Pada pilihan raya umum ke-13 lepas, SPDP memenangi keempat-empat kerusi parlimen yang ditandinginya di Sarawak.

Menurut Mawan, SPDP yakin perdana menteri dan Ketua Menteri Sarawak Tan Sri Abdul Taib Mahmud sentiasa prihatin terhadap SPDP, kaum Dayak dan semua kaum lain.

Beliau memberi komitmen penuh SPDP untuk terus setia kepada BN dan kepimpinan Najib dan Taib, dalam apa jua keadaan.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=954961>